

В ЧЕТВЕРТОК 3-Я СЕДМИЦЫ ВЕЧЕРА.

На Господи воззвах, поставим стихов 6, и поем настоящия подобны 3, трипеснца, и Минеи 3.

Стихиры господина Иосифа, глас 5.

Подобен: Радуйся постников:

Спасе истинная сладосте, / горькия Мерры древле воды усладивый образом тогда древа, / Божественнаго Креста, простерся на нем, / якоже благоволил еси: / желчи же вкусил еси, / в ребра прободен, из нихже миру вода излилася оставления, / на обновление земнаго смешения. / Темже славословим Твою неизреченную силу, и молимся: / подаждь нам страх Твой Господи, / во время пощения, / и прощение согрешений, и велию милость.

Слове прострыйся на Кресте, / собирая далече отстоящия от Тебе, / вознес помышление мое от гноя страстей, / добродетельми всяческими обогати, / подавая сердцу моему чистейший страх Твой / и души моей совершенную любовь, / плотския мя любве отсецающую: / яко да воздержанием Тебе, молитвою и молением, / в настоящия дни угожду, / и узрю Твой светлый день Воскресения, / приемля велию милость.

Ина стихира господина Феодора, глас 1.

Подобен: Облак Тя светлый:

Третью честных постов седмицу Христе Слове, / прешедших, древо живоноснаго Креста Твоего видети сподоби нас, / и честне поклонитися, и пети по достоянию / и славити державу Твою, / воспети страсти Твоя, / предварити славное чисте и святое Воскресение, / Пасху тайную, / еюже Адам паки вниде в рай.

И в Минеи 3. Слава, и ныне, Богородичен.

Прокимен, псалом 55, глас 6: Помилуй мя Боже, яко попра мя человек.

Стих: Попраша мя врази мои весь день.

Бытия чтение. [Глава 7, ст. 11 – 24. Глава 8, ст. 1 – 3.]

Бысть в шестьсотное лето в житии Ноеве, втораго месяца, в двадесять седмый день месяца, в день той разверзошася вси источники бездны, и хляби небесныя отверзошася. И бысть дождь на землю четыредесять дней, и четыредесять ночей. В день той вниде Ное, Сим, Хам, Иафет, сынове Ноевы, и жена Ноева, и три жены сынов его с ним в ковчег. И вси зверие земнии по роду, и вси скоти по роду, и всякий гад движущийся на земли по роду, и всякая птица пернатая по роду своему: Внидоша к Ною в ковчег два два, мужеский пол и женский, от всякия плоти, в нейже есть дух животный. И входящая мужеский пол и женский от всякия плоти внидоша к Ною в ковчег, якоже заповеда Господь Бог Ною: и затвори Господь Бог ковчег отвне его. И бысть потоп четыредесять дней, и четыредесять ночей на земли, и умножися вода, и взя

ковчег, и возвысися от земли: И возмогаше вода, и умножашеся зело на земли, и ношашеся ковчег верху воды. Вода же возмогаше зело зело на земли: и покры вся горы высокия, яже бяху под небесем: Пятнадцать лактей горе возвысися вода, и покры вся горы высокия. И умре всякая плоть движущаяся по земли, птиц и скотов и зверей, и всякий гад движущийся на земли, и всякий человек. И вся елика имут дыхание жизни, и все еже бе на суши, умре. И потребися всякое востание, еже бяше на лице всея земли, от человека даже до скота, и гадов, и птиц небесных, и потребишася от земли: и оста Ное един, и иже с ним в ковчезе. И возвысися вода над землею дней сто пятьдесят. И помяну Бог Ноа, и вся звери, и вся скоты, и вся птицы, и вся гады пресмыкающияся, елика беху с ним в ковчезе: и наведе Бог дух на землю, и преста вода. И заключишася источники бездны, и хляби небесныя: и удержася дождь от небесе. И вспять поиде вода, идущая от земли: и умаляшеся вода, по сте пятидесятих дней.

Прокимен псалом 56, глас 7: Помилуй мя Боже, помилуй мя, яко на Тя упова душа моя.

Стих: И на сень крилу Твоею надеюся.

Притчей чтение. [Глава 10, ст. 1 – 22.]

Сын премудр веселит отца: сын же безумен печаль матери. Не пользуют сокровища беззаконных, правда же избавит от смерти. Не убьет гладом Господь душу праведную, живот же нечестивых низвратит. Нищета мужа смиряет: руке же мужественных обогащаются. Сын наказан премудр будет, безумный же слугою употребится: спасется от зноя сын разумный, ветротленен же бывает на жатве сын беззаконный. Благословение Господне на главе праведнаго: уста же нечестивых покрывает плачь безвременный. Память праведных с похвалами: имя же нечестивых угасает. Премудр сердцем примет заповеди: непокровенный же устнама остроптевая запнется. Иже ходит просто, ходит надеяся: развращая же пути своя, познан будет. Намизаяй оком с лестию, собирает мужем печали: обличай же со дерзновением, миротворит. Источник жизни в руке праведнаго: уста же нечестиваго покрывает пагуба. Ненависть воздвизает распрю: всех же нелюбопрительных покрывает любовь. Иже от устен произносит премудрость, жезлом биет мужа безсердечна. Премудрии скрывают чувство, уста же продержаго приближаются сокрушению. Стяжание богатых град тверд: сокрушение же нечестивых нищета. Дела праведных живот творят, плодове же нечестивых грехи. Пути жизни хранит наказание: наказанием же не обличенный заблуждает. Покрывают вражду устне правыя: изнасящи же укоризну безумнейшии суть. От многословия не избежиши греха: шадяй же устне, разумен будеши. Серебро разжженное язык праведнаго: сердце же нечестиваго исчезнет. Устне праведных ведут высокая: безумнии же в скудости скончаваются. Благословение Господне на главе праведнаго: сие обогащает, и не имать приложитися ему печаль в сердцах.

На стиховне самогласен дне, дважды. Глас 6:

На древе Крестнем обещена жизнь всех Христе Боже, / оживи мою душу умерщвленную прегрешеньми: / и да не всеконечно погибнути оставиши Твое овча, / Пастырю добрый. / Отступих от Твоих заповедей, / и безгрешия богатство, / еже даровал ми еси, / расточих грехолюбным произволением, / растлех же и омерзихся в блудных начинаниих: / но обнови мя к покаянию привлек, едина Многомилостиве.

Стих: **К** Тебе возведох очи мои, живущему на небеси. Се яко очи раб в руку господий своих, яко очи рабыни в руку госпожи своея: * тако очи наши ко Господу Богу нашему, дондеже ущедрит ны.

На древе Крестнем обещена жизнь всех Христе Боже, / оживи мою душу умерщвленную прегрешеньми: / и да не всеконечно погибнути оставиши Твое овча, / Пастырю добрый. / Отступих от Твоих заповедей, / и безгрешия богатство, / еже даровал ми еси, / расточих грехолюбным произволением, / растлех же и омерзихся в блудных начинаниих: / но обнови мя к покаянию привлек, едина Многомилостиве.

Стих 2: **П**омилуй нас Господи, помилуй нас, яко по многу исполнихомся уничижения: наипаче наполнися душа наша поношения гобзующих, * и уничижения гордых.

Мученичен: Мученицы Твои Господи, / не отвергошася Тебе, / ни отступиша от заповедей Твоих: / тех молитвами помилуй нас.

Слава, и ныне, Крестобогородичен.

Подобен: Трिдневный:

Видящи Тя распинаема Христе Тебе Рождшая, вопияше: / что странное еже вижду таинство, Сыне Мой? / како на Древе умираещи плотию повешен, / жизни Подателю?

В ПЯТОК 3-я СЕДМИЦЫ НА УТРЕНИ,

Троичны гласа. По 1-м стихословии глаголем седальны Крестны Осмогласника.

**По 2-м же стихословии глаголем настоящий
седален господина Иосифа. Глас 5.**

Подобен: Собезначальное:

Снеди древом, древле умершии человецы, / Крестом Твоим Щедре, ожихом, / егоже силою Блаже, нас укрепи, / воздержания время во умилении прейти, / творящая волю Твою, / и день видети светоноснаго Воскресения.

Слава, тойже.

И ныне, Крестобогородичен:

На Кресте Тя видящи Христе Мати Твоя, / волею посреде разбойников висяща, / и биющи матерски утробу, глаголаше: / безгрешный Сыне, како неправедно на Кресте яко злодей водружен еси, / человеческий хотя оживити род, яко благоутробен.

По 3-м стихословии седален господина Феодора. Глас 1.

Подобен: Камени запечатану:

Плоть очистивших от воздержания, / и в молитвах просветивших души наша Господи, / честный Крест Твой и святой сподоби нас видети, / и со страхом поклонитися в песнях поющих, и глаголющих: / слава живоносному Кресту, / слава божественному копию Твоему, / имже ожихом, едине Человеколюбче.

Слава, тойже.

И ныне, Крестобогородичен:

Агнца на Древе Агница видящи, / с разбойники долготерпеливе распинаема Тя Слове, / и копием в ребра прободаема, / рыдаше вопиючи матерски: / что странное и ужасное Иисусе Мой таинство? / како покрывается гробом неописанный Бог? / Несказанно есть содеваемое: / не остави Мя едину Тя рождшую, / Иисусе Мой сладчайший.

Канон Минеи, и настоящия трипесницы, господина Иосифа.

И стихословится песнь. Глас 5.

Песнь 5.

Ирмос: Одейся светом яко ризою, / к Тебе утренюю, и Тебе зову: / душу мою просвети омраченную Христе, / яко Един Благоутробен.

Исцели мя Господи, и исцелюся язвою Твоею, души моя очистив язвы, плотию страсти Христе приемый.

Тебе якоже виде плотию висима Христе на Древе, свет во тьму прелагаше солнце, и земля подвижется, и камение распадошася.

Тернием обрастшую и оляденевшую мою душу, всяких страстей виды, Господи очисти, венчавыйся тернием, за крайнюю благодать.

Богородичен: Ново породила еси яко Младенца Всечистая Содетеля моего: Егоже моли, обетшавшаго мя во мнозе злобе обновити Владычице.

Иный господина Феодора. Глас 1.

Ирмос: От нощи утренююще, / воспеваем Тя Христе Боже, / обнищавшаго нас ради, / и Крест и смерть плотию претерпевшаго.

На месте Лобнем иудеи Тебе распяша Христе, покиваша главами своими, смеющесе и ругающесе: Ты же терпел еси во еже спасти нас.

На титле Креста Твоего, написав Пилат трегубо, единого от Троицы Тя, волею пострадавша являше, за всех спасение Христе.

Троицен: Пресветлыя Троицы, трисолнечное воспоем вернии, Свет Отца чтуще, Свет Сына славяще, Свет и Духа возвещающе.

Богородичен: Ангел вышшую, из Тебе рождейся показа Тя Чистая: Егоже бо они трепещут яко Бога зрети, Ты на руку носиши яко Сына Твоего Чистая.

Слава Тебе Боже наш, слава Тебе.

Кресте всечестный, спасительный, миру хранителю, соблюди мя постящася, и достойна покажи твоего честнаго поклонения.

Ирмос: От нощи утренююще, / воспеваем Тя Христе Боже, / обнищавшаго нас ради, / и Крест и смерть плотию претерпевшаго.

Песнь 8.

Ирмос: Тебе Вседетелю, в пещи отроцы, / всемирный лик сплетше, пояху: / дела всякая Господа пойте, / и превозносите во вся веки.

Простерл еси на Кресте Христе Твои длани, руки праотца невоздержанное потребляя: Древом же древа исцелил еси клятву. Темже Тя поем во вся веки.

Тебе волителю спасения Слове припадаю, хотения лукавая устави вскоре от моего сердца, Крест и страдание волею претерпевый.

Блудную жизнь и оскверненное житие возжелав, омрачихся аз блудный: осияй ми лучу обращения Слове, солнца сияние в страдании омрачивый.

Богородичен: Устави мою многоболезненную всю сердечную злобу, Мати Христа Бога, сокруши стрелы и луки бесов, борющихся смиренную душу мою.

Иный.

Ирмос: Песнословцы в пещи спасшаго дети, / и громопламенную преложшаго на росу, / Христа Бога пойте, / и превозносите во вся веки.

Что Тебе пострадавшему принесем, всех Владыце мы окаяннии: нас бо ради Крест претерпел еси Христе. Поем безмерныя милости Твоя благодать.

На древе воздвигоша Христе иудее, завистию убивши Тя, не умалиша державы славы Твоя беззаконнии: еси бо всех Владыка волею пострадавый.

Благословим Отца, и Сына, и Святаго Духа, Господа.

Троичен: Пресущественнаго Божества три Лица почитаю: Отца безначальна, Сына, и Духа Святаго, Естеством несекомое Существо славлю во веки.

Богородичен: Небес вышшую, и херувим превышшую, святопервую и нескверную Отроковицу всех Бога поем, и превозносим во вся веки.

Слава Тебе Боже наш, слава Тебе.

Преблаженне Кресте Христов, небописанная победо, от земли нам прозябл еси, твоего поклонения достойны покажи ны вся, постом очистившиися.

Хвалим, благословим, поклоняемся Господеви:

Ирмос: Песнословцы в пещи спасшаго дети, / и громопламенную преложаго на росу, / Христа Бога пойте, / и превозносите во вся веки.

Песнь 9.

Ирмос: Исаие ликуй, Дева / име во чреве, / и роди Сына Еммануила, / Бога же и Человека, / Восток Имя Ему: / Егоже величающе, Деву ублажаем.

Окамененное ожесточение души мояя благоутробне Спасе омый, и источник даждь ми Блаже, Божественнаго умиления, из ребр источник мой мне жизнь, беззакония моего потоки потребляющую.

Самаго себе вверг во глубины грехов, высоты оставив добродетелей: но привлецы и спаси мя возшедый на Крест, и человечество привлекий к Себе Господи.

Сладость сый Господи и наслаждение, яко Содетель, желчи вкусил еси Христе, от сладости сущее отпадение, еже из Адама Ты исправляя: темже Тя поем спасшиися Твоими страстьми.

Богородичен: Всечистая Владычице, упование мое и прибежище, язвы души мояя исцели, ум мой умири. Да и аз радуясь, воспою величия Твоя Богородице Приснодево.

Иный.

Ирмос: Тя Юже виде Моисей неопалимую купину, / и лестницу одушевленную, / юже Иаков виде, и дверь небесную, / еюже пройде Христос Бог наш, / песньми Мати Чистая величаем.

Тебе, Егоже беззаконнии Христе, одеяша ругательно в порфиру и венец, яко Царю ругающесе, тростию главу Твою ударяюще, распинающе завистию, и желчию напаяюще, песньми вси вернии величаем.

Тя, Егоже солнце видящее страждуца на Кресте, свет сокры, всей вкупе твари, Владычним досаждением преклоняющейся и распадающимся камением, песньми Христе Спасе величаем.

Троицен: Свет и Жизнь и Вседетель, трисолнечное Единство, Бог же и Господь, едином светом сияя, сооблистая трети начертаньми во едином Божестве, Сего вси вернии величаем.

Богородичен: Тебе Юже Давид певец пропевае Сион, в нюже вселися небесы невместимый, и созда от утробы Твоея, миру очищение, песньми Мати Чистая величаем.

Слава Тебе Боже наш, слава Тебе.

Твой спасительный Крест, просветителя верных, сподоби Господи воздержанием текуция предварити, видети, и поклонитися, во освящение наше, да Тя им величаем.

Ирмос: Тя Юже виде Моисей неопалимую купину, / и лествицу одушевленную, / юже Иаков виде, и дверь небесную, / еюже пройде Христос Бог наш, / песньми Мати Чистая величаем.

Светилен гласа.

На стиховне самогласен дне, дважды. Глас 6.

Отеческаго дара расточих богатство, / в блуде иждих житие, / лукавными помыслы, / греха моего соотведся, / и сладостию страсти наслаждаемь, / несмысленным скотом уподобихся, / спасительных заповедей преступлением: / но благоволивый на Кресте повеситися мене ради Христе Боже, / не отрини мене Твоего сыноположения, / но обращающася приими, / яко блуднаго сына, / и спаси мя.

Стих: Исполнихомся заутра милости Твоея Господи, и возрадовахомся, и возвеселихомся: во вся дни наша возвеселихомся, за дни в няже смирил ны еси, лета в няже видехом злая. И призри на рабы Твоя, и на дела Твоя, и настави сыны их.

Отеческаго дара расточих богатство, / в блуде иждих житие, / лукавными помыслы, / греха моего соотведся, / и сладостию страсти наслаждаемь, / несмысленным скотом уподобихся, / спасительных заповедей преступлением: / но благоволивый на Кресте повеситися мене ради Христе Боже, / не отрини мене Твоего сыноположения, / но обращающася приими, / яко блуднаго сына, / и спаси мя.

Таже стих: И буди светлость Господа Бога нашего на нас, и дела рук наших исправи на нас, и дело рук наших исправи.:

Мученичен: Господи, в память святых Твоих, / вся тварь празднует, / небеса радуются со ангелы, / и земля веселится с человеки. / Тех молитвами помилуй нас.

Слава, и ныне, Крестобогородичен, глас тойже.

Подобен: Трдневен:

Всечистая, яко виде Тебе на Кресте повешена, / плачуци вопияше матерски: / Сыне Мой, и Боже Мой, / сладчайшее Мое чадо, како терпиши страсть поносную.

НА 6-М ЧАСЕ ТРОПАРЬ ПРОРОЧЕСТВА, ГЛАС 8:

Словом вся Твоею совершил еси силою Боже, / и от небытия в бытие привел еси нас, / не предаждь нас беззаконием нашим, / безгрешне Господи, молимся.

Прокимен, псалом 57, глас 6: Возвеселится праведник, егда увидит отмщение.

Стих: Аще воистинну убо правду глаголете.

Пророчества Исаиина чтение. [Глава 13, ст. 2 – 13.]

Также глаголет Господь: на горе польней воздвигните знамение, вознесите глас им, не бойтесь: поущайте рукою, отверзите князи. Аз повелеваю, освящени суть: и Аз веду их, исполини идут исполнити ярость Мою радуящиеся, вкупе и укаряюще. Глас языков многих, на горах, подобен языков многих, глас царей, и языков собравшихся. Господь Саваоф заповеда языку оружеборцу, Прийти от земли издалеча, от края основания небесе, Господь и оружеборцы Его, растлiti всю вселенную. Рыдайте: близ бо день Господень, и сокрушение от Бога приидет. Сего ради всяка рука разслабеет, и всяка душа чelовеча убоится: И смятутся послы, и болезни примут я яко жены раждающия: и поскорбят друг ко другу, и ужаснутся, и лице свое яко пламень изменят. Се бо день Господень грядет неисцельный ярости и гнева, положити вселенную [всю] пyсту, и грешники погубити от нея. Звезды бо небесныя и Орион, и все украшение небесное, света своего не дадут, и помрачится солнце возсиявающее, и луна не даст света своего. И заповем всей вселенней злая, и нечестивым грехи их: и погублю укоризну беззаконных, и укоризну гордых смирю. И будут оставшии честнии паче, нежели злато нежженное: и человек честен будет паче, нежели камень, иже от Суфира. Разъярится бо небо, и земля потрясется от оснований своих, за ярость гнева Господа Саваофа в день, воньже приидет ярость Его.

Прокимен, псалом 58, глас 7: Боже Заступник мой еси Ты и милость Твоя предварит мя.

Стих: Изми мя от враг моих Боже: